

# KANTIK


ITRON VARIA KERINEK

E PARREZ POUILLAN

WAR DON : *Itron Varia Rumengol.*

DISKAN :

*Itron Varia Kerinek,  
Savit ho torn ken galloudek,  
Da venniga ho pugale  
Eus an Arvor hag ar Mene !*



1. E Kerinek, parrez Poullan,  
E kaver eur chapel vihan,  
Bet savet gant hon tadou koz  
D'eoc'h, Rouanez ar Baradoz !
2. Parrez Poullan a bep amzer  
Ho karas stard, Mamm hor Zalver ;  
C'houi, Mari, evel eur vamm vat,  
A garaz Poullaniz dalc'hmad...
3. Ar poanier paour, war hor maeziou,  
Vit kaout kalon en e boaniou,  
War-zu an Nenv a dro bemdez  
Da c'houlenn ho pennoz, Gwerc'hez !
4. Al labourer, en e labour,  
Gant Mari a c'houlenn sikour ;  
Kerkent e tiredit, Mamm vat,  
Da venniga e bark, e brad.

5. Pesketer Treboul alies,  
Dindan ar barr-amzer diaes,  
En e vag, ho ped kalonek,  
Gant fizians, Gwerc'hez Kerinek :
6. « Intron Varia Kerinek,  
Va diwallit ouz ar c'herrek ! »...  
Buan, Gwerc'hez, ho mouez karet ;  
A c'hourdrouz ar mor kounnaret.
7. Da Gerinek, laouen, seder,  
Poullaniz a red gant douzder ;  
Hor poaniou, Gwerc'hez, a dec'h pell  
Pa dostaomp ouz ho Chapel...
8. Da Gerinek omp deut hirio,  
Mari, da veuli hoc'h hano ;  
Ha da c'houlenn ho pennoziou  
Evit hon tud hag hor maeziou.
9. Mari, refuch ar bec'herien,  
Bennigit ho pardonerien :  
Ha roit d'eomp ar grasou nerzuz  
A red euz kalon Mamm Jezuz !
10. Hirio, Mamm dener, hep dale  
Klevit pedenn ho pugale :  
Mirit d'hor Bro tenzor ar Feiz !  
Diwallit Bro-C'hall hag hor Breiz !
11. Mirit bepred ar feiz gristen  
Griziennet e kalon pep den,  
Ha grit ma talc'ho Poullaniz  
Da startât bemdez en o feiz !

12. Diwallit mat parrez Poullan !  
Koz ha yaouank, bras ha bihan,  
Holl en em westlomp d'eoc'h hirio  
Betek an eur eus hor maro !
13. Evel eul labousig d'e neiz,  
E tiredomp aman gant feiz ;  
Rag Kerinek, c'houi vo bepred  
Hon neizig tra ma vimp er bed !
14. Keit vo kerrek war hon aochou  
Ha dero krenv en hor c'hoajou,  
Poullaniz ho meulo, Gwerc'hez,  
E Kerinek gant karantez !
15. Ha pa zigouezo ar maro,  
Gant fizians ni a lavaro :  
« Deut omp betek dor ar Vuhez,  
Digorit d'eomp an Nenv, Gwerc'hez !
16. « Gwerc'hez, digorit dizale,  
Emomp aman ho pugale !  
Mamm garet, emomp o c'hortoz  
Pignat ganeoc'h d'ar Baradoz !

*Pardon Kerinek a zigouez bep bloaz d'an trede  
sulvez a viz gouere ; oferennet e vez er chapel ;  
bemdez, epad an eizveid varlerc'h ar pardon, d'al  
Lun-Fask, ha da Lun-ar-Pantekost.*

IMPRIMATUR

Quimper, le 31 Mai 1906.

Em. FLEITER, Vic. gén.